



Kaupae 1 Hauora 2025

92058 Te tautohu i ngā āhuatanga matua o te kaitiakitanga me te hononga ki te oranga

Whiwhinga: 5

Kairangi	Kaiaka	Paetae
Ka whakamārama i ngā āhuatanga matua o te kaitiakitanga me te hononga ki te oranga.	Ka whakaahua i ngā āhuatanga matua o te kaitiakitanga me te hononga ki te oranga.	Ka tautohu i ngā āhuatanga matua o te kaitiakitanga me te hononga ki te oranga.

TAUIRA TAUAROMAHĪ

No part of the candidate's evidence in this exemplar material may be presented in an external assessment for the purpose of gaining an NZQA qualification or award.

Hei tā Ākonga A

Kairangi - Ka whakamārama i ngā āhuatanga matua o te kaitiakitanga me te hononga ki te oranga.

Kaitiakitanga

TAONGA TUKUHIO: Niwareka

Kua tīpakona te Niwareka hei kaupapa kōrero māku.

Ko Ruaumoko
Ko Manuongaonga
Ko Uetonga
Ko Niwareka

Matariki ki te rangi, Matariki ki te whenua, ko ōku atua wāhine tāku e whakahua nei. Kei te takotoranga o te marae, otirā, kei tōna whare tipuna e pupuritia nei a rātau korero. Ka piki atu rā ahau ki te tomokana o tōku marae, kia mihi atu ai au ki a Apakura. Ka rere whakamua taku nei hīkoi ka mihi ki te whare, ka rere tōku tiro ki te taha mauī ōna ka mihi atu au ki te kuia whaea kia Hineahuone. Ka whakawhiti atu taku nei titiro ki te amo katau ōna ka mihi au ki te tamahine rā ki a Hinētītama. Ka whakaemi mai taku nei titiro ki te pouāwha o te whare, ka mihi atu ki te whakakotahitanga o te tokurua rā ki a Hinenuitepo. Ka uru tonu ki roto i te tatau o tōku whare ka rere atu ki te poutūngaroa, kei te pou tūngaroa ko ōku kuia tokorua ko Murirangawhenua rāua ko te wera wera o Mahuika. Ka rere whakamua ki te pito tonu o tōku whare, ka toro taku ringa ki te pou toko manawa ki a Hineteiwaiwa, ka mihi ki tēnā whaea ōku e pupuri nei i te mana o te whare tangata. Ka mutu atu ki te pou tāhūhū o tōku whare, ki reira ka kite atu ia Hineraukatauri te puhi o te iwi.

Ko ēnei maramara kōrero e pupuri nei i tōku whare atua wahine. Ko Apakura o te aroha. Ko Hineahuone o te kura. Ko Hinētītama o te tapu. Ko Hinenuitepō o te wairua. Ko Murirangawhenua o te kauwae. Ko Mahuika o te mauhī. Ko Hineteiwaiwa o te kotahi. Ko Hineraukatauri o te rerehua. Ā tōna wā ka tāngia a rātau tohu ki tōku kanohi, hei Niwareka. Ka noho mai au hei kaitiaki i a rātau kōrero tukuiho, otirā, hei kaitiaki i te taonga tukuiho o te Niwareka me ngā haepapa rau ōna. Anei ētahi o ngā haepapa e haere tahi nei me te Niwareka. Tuatahi ake ko te tiaki i te whakapapa, nā te wahine tērā mahi i te mea kei a mātau te whare tangata. Tuarua ko te whakatipu tangata mā te aroha, aroha ki ōatua, ki ōtipuna, ki ōhononga, mutu ake ki te reo whakahonohono i te pēpē ki tōna taiao. Mau ana au i taku Niwareka, kei te mōhio pū au ka ora i au tōku ao Māori, ka ora i au tōku whakapapa, ka ora i au tōku reo, ka ora ōku atua, ōku tīpuna i au, ka mutu, ka ora i au tōku ahurea Māori. Koinei taku whakahoki ki tōku whare atua wāhine, riwhai ai taku tiaki i a rātau taonga tukuiho.

Kairangi

Te Wāhanga Ako: Hauora

Te Paerewa: 92058

Te Maaka: K8

Te Pātai	Ngā kōrero pitopito
<p>Tuatahi</p>	<p>Miharo! Ātaahua ngā whakaaro me ngā kōrero hōhonu o tēnei ākongā. Kua whakaatu atu i tōna māramatanga, tōna ngākaunui hoki e pā ana ki tēnei kaupapa Motuhake. Kia pānui i tāna tuhinga, ka rongō i te wairua o tino hiahia kia tāngia ō rātou ki tōna kanohi hei Niwareka.</p> <p>Kia riro i a ia te Niwareka ka hiahia kia noho hei kaitiaki i ā rātou kōrero tuku iho, hei tohu hoki ' ... i te taonga tuku iho o te Niwareka ...' me ōna haeapa. E ai ki a ia, kia mā tōna Niwareka, ka ora i a ia tōna ahurea Māori.</p>

Hei tā Ākonga E

Kairangi - Ka whakamārama i ngā āhuatanga matua o te kaitiakitanga me te hononga ki te oranga.

Hei tāpiritanga o ngā kōrero ki raro iho, i tukua mai te ākonga i tētahi whakaahua o tōna whānau e mau ana i te tāonga a kōrerotia.

9 o Oketopa 25'

Kia tahuri taku oha ki te tahuu o taku whare korero, ana ko toku taonga tuku iho, te kahukiwi. Ko te ingoa o tō mātou korowai ko Kahukiwi. He taonga tuku iho nō ngā rā o mua e mau tonu ana te mana me te wairua o tō mātou tūpuna nō [REDACTED] i Ōtaki. Kei te tiaki i tēnei taonga tōku koro, a [REDACTED], he uri nō te whānau [REDACTED], nō te hapū o Ngāti [REDACTED].

Ko te ingoa Kahukiwi e tohu ana i te māhaki, te kaha me te uara o te kiwi, he manu rangatira, he tohu o te tapu me te mana motuhake. I ia huruhuru me ia whenu o te korowai, i rarangatia he karakia me te aroha hei whakamarumaruru me te whakapūmau i te hononga ki tō mātou tūpuna pērā i a Huia, Whatanui, Te Rauparaha, me ngā whakapapa o Ngāti [REDACTED].

I ēnei rā ka mau tonu a Kahukiwi i ngā ahuatanga nui o te iwi pērā i te tangihanga, te mārena, ngaa raa whakapumau, He tohu whakamaharatanga, he kākahu rangatira, ā, he hononga ki te oranga o te whakapapa o tō mātou whānau [REDACTED] me tō mātou marae [REDACTED].

Kairangi

Te Wāhanga Ako: Hauora

Te Paerewa: 92058

Te Maaka: K8

Te Pātai	Ngā kōrero pitopito
Tuatahi	<p>Hōhonu, whānui hoki ngā kōrero e hāngai ana ki te mana me te tapu o te korowai.</p> <p>I whakamāramahia tēnei ākonga te hītori o te korowai, ā, kei te taonga nei te mana me te wairua o ngā tūpuna o te marae. I whakamāramahia i te tohu o te korowai mō te whakapapa me te rangatiratanga o te hapū, ā, o rātou tikanga e pā ana ki te tiakitanga o te taonga. I kōrerohia hoki te ākonga āhea mau ai te korowai, ā, nei kāore te whānau e whakaae, kia mau e tētahi, ka rāhuitia te korowai.</p>